



Mehmedović švercovao oružje s osmoricom

Prijavljeni se dovode u vezu s pronalaskom 1,6 tona naoružanja kod Tešnja

Državna agencija za istrage i zaštitu (SIPA) uputila je jučer Tužilaštvu BiH izvještaj o počinjenom krivičnom djelu protiv devet osoba koje se dovode u vezu s pronalaskom velike količine naoružanja na lokalitetu sela Kaloševići, u općini Tešanj, potvrđeno je „Dnevnom avazu“ u ovoj državnoj agenciji.

Nezvanično nam je potvrđeno da je jedan od prijavljenih protiv kojeg je SIPA podnijela krivičnu prijavu i Šemsudin Mehmedović (SDA), poslanik u Parlamentu BiH, koji se već mjese-

cima dovodi u vezu sa sakrivenim naoružanjem.

Mehmedovića su ranije za ove nezakonitosti u izjavi za „Avaz“ optužili i bivši komandanti odbrane Tešnja Muharem Ahmić i Sabahudin Sinanović Hudo, navodeći da su oni po njegovoj naredbi zakopavali pronađene granate, ali da je cijelom akcijom rukovodio upravo Mehmedović.


U svom izvještaju Tužilaštvu SIPA navodi da su ove osobe počinile krivična djela udruživanja radi činjenja krivičnih djela, nedopuštenog držanja oružja i

eksplozivnih tvari te izazivanja opće opasnosti.

Ovime je potvrđeno pisanje „Avaza“, koji je prvi objavio informaciju da je SIPA uspjela utvrditi ko je i po čijem naređenju zakopavao oko 1,6 tona naoružanja pronađenog u općini Tešanj.

Pripadnici SIPA-e, naime, pronašli su još početkom jula 588 kumulativnih projektila za ručni raketni bacač RPG, 589 barutnih punjenja za projektele, 60 projektila tipa 84 milimetra za bestrzajni top.

Riječ je o najvećoj ko-



ličini naoružanja, municije i eksplozivnih sredstava koja je pronađena od završetka rata u BiH. **M. AŠČIĆ**